

卷三十

列傳中

同州府志

同州府志卷三十

列傳中

唐

徐齊暉字將道其先家吳興隋平陳徙族入雍遂爲馮翊
人祖方貴臨貞令父果州刺史齊暉八歲工文辭太宗詔
賜所佩金削刀稱神童舉宏文生調曹王府參軍高宗
時歷崇文館學士時女弟爲帝媿好嫌以恩進求出爲桃
林令召爲沛王侍讀再進司議郎皆不就累進西臺舍人
咸亨初詔哭厥酋長子弟侍東宮齊暉上書諫以非左右

惟其人之義又長孫無忌以讒死家廟毀頓齊眡言後嗣
有罪不宜毀及先廟帝寤復齊獻公官以無忌孫延主其
祀齊眡善文誥帝令侍皇太子及諸王屬文以職樞劇許
間日一至後坐漏禁中事貶蘄州司馬又流欽州卒睿宗
時贈禮部尙書

大荔志

馮立馮翊人有武藝略涉書記隱太子建成引爲翊衛軍
騎將軍建成被誅其左右多逃散立嘆曰豈有生受其恩
而死逃其難乎於是率兵犯元武門苦戰久之解兵遁於
野俄來請罪太宗慰勉之未幾突厥至便橋立率數百騎

與虜戰於咸陽殺獲甚衆太宗聞而嘉歎拜廣州都督不

營產業取給衣食而已在職數年甚有惠政卒於官

大荔志

徐堅字元固齊暉子幼有敏性沛王聞其名召見授紙爲賦異之十四而孤及壯寬厚長者舉秀才及第爲汾州參軍遷萬年簿天授三年上言書有五聽令有三覆慮失情也比犯大逆一勘輒決非所以重人命又古罰不逮嗣今選部廣責逆人親屬至無服者尙數十條請如詔書外一切不禁以申曠蕩聖歷中畱守楊再思王方慶共引爲判官方慶善學禮嘗就質疑晦自謂得所未聞堅屬文典厚

再思每目爲鳳閣舍人樣與張說等預修三教珠英時張
昌李嶠總領彌年不下筆堅與說專意撰綜諸儒因之成
書累遷給事中封慈源縣子俄以禮部侍郎爲修文館學
士睿宗卽位授左庶子兼崇文館學士修史歷東海郡公
黃門侍郎時李知古請城瀾河賊降蠻堅上議不可弗聽
後殺知古而叛姚雋路閉不通者數年以妻岑羲女弟固
辭機密後羲敗不及於難出爲絳州刺史數外徙久乃遷
散騎常侍元宗改集賢院以堅充學士副張說知院事從
上泰山以參定儀典加光祿大夫堅多諳典故七當譔次

高選卒年七十餘帝悼惜遣使就弔贈太子少保諡曰文
子嶠字巨山開元中爲駕部員外歷集賢院直學士中書
舍人父子相次爲學士三世爲中書舍人

大荔志

孟利貞華陰人父神慶沁州刺史以清介著名利貞初爲
太子司議郎受詔與少師許敬宗崇賢學士郭瑜顧引董
思恭等撰瑤山玉彩五百卷龍朔二年奏上之高宗稱善

又撰續文選三十卷兄允忠垂拱中天官侍郎

府志

喬知之馮翊人父師望尙高祖女廬陵主官至同州刺史
知之與弟侗備並以文詞知名知之又稱俊才所作篇咏

時人多諷誦之則天時遷左司郎中有侍婢曰竊娘美麗
善歌舞爲武承嗣所奪知之作綠珠篇以寄情密送婢婢
感憤自殺嗣怒諷酷吏羅織之偏開元初爲兗州都督預
修三教珠英卒於襄陽令

大荔志

楊宏禮字履莊素弟岳之子隋亡高祖卽位以素有功於
隋詔宏禮襲清河郡公除太子通事舍人貞觀中累遷中
書舍人太宗征遼東拜兵部侍郎駐蹕之役領步騎二十
四軍跳出賊背所向摧靡帝自山上望其衆袍仗精整人
人盡力壯之謂許敬宗曰越公兒郎故有家風時宰相悉

畱定州輔皇太子唯褚遂良敬宗宏禮掌行在機務還拜
中書侍郎遷司農卿爲崑邱道副大總管破處密殺焉耆
王降馭支部護龜茲于闐王凱旋會帝崩大臣疾之下遷
涇州刺史永徽初追論其功遷勝州都督改太府卿卒贈
蘭州都督謚曰質

華陰志

楊炯華陰人伯祖虔威武德中官至右衛將軍炯幼聰敏
博學善屬文神童舉拜校書郎爲崇文館學士儀鳳中太
常博士蘇知幾上表以公卿以下冕服請別立節文勅下
有司詳議炯獻議曰古者太昊庖犧氏仰以觀象俯以察

法造書契而文籍生次有黃帝軒轅氏長而敦敏成而聰
明垂衣裳而天下理其後數遷五德君非一姓體國經野
建邦設都文質所以再而復正朔所以三而改夫改正朔
者謂夏后氏之建寅殷人建丑周人建子至於以日繫月
以月繫時以時繫年此三王相襲之道也夫易服色者謂
夏后氏尙黑殷人尙白周人尙赤至於山龍華蟲宗彛藻
火粉米黼黻此又百代可知之道謹按虞書曰予欲觀古
人之象日月星辰山龍華蟲作繪宗彛藻火粉米黼黻絺
繡由此言之則其所從來者尙矣日月星辰者光明照下

土也山者布散雲雨象聖王大澤霑下也龍者變化無方
象聖王應機布殺也華蟲者雉也身被五彩象聖王體兼
文明也宗彛者武雉也以剛猛制物象聖王神武定亂也
藻者逐水上下象聖王隨代而應也火者陶冶烹飪象聖
王至德日新也粉米者人恃以生象聖王物之所賴也黼
能斷割象聖王臨事能決也黻能兩已相背象君臣可否
相濟也迨有周氏乃以日月星辰爲旌旗之飾又登龍於
山登火於宗彛於是乎制衮冕以祀先王也九章者法陽
數也以龍爲首章衮者卷也龍德神異應變潛見表聖人

深沉遠智卷舒神化也又制鷩冕以祀先公鷩者雉也有耿介之志表公有賢才能守耿介之節也又制毳冕以祭四望岳瀆之神也武雉者山林所生明其象也制絺冕以祭社稷土穀之神也社稷粉米由之成象其功也又制元冕以祭羣小祀百神異形難可遍擬但取黼之相背異名也夫以周公之多才也故治定制禮功成作樂夫以孔宣之將聖也故行夏之時服周之冕先王之法服乃自此而出矣天下之能事又於是乎畢矣今知幾表狀請制大明冕十二章乘輿服之者謹按日月星辰者已施於旌旗矣

龍武山火者又不踰於古矣而云麟鳳有四靈之名元龜
有負圖之應雲有紀官之號水有盛德之象此蓋別表休
徵終是無踰此象然則皇王受命天地興符仰觀則璧合
珠連俯察則銀黃玉紫殫南宮之粉壁不足寫其形狀罄
東觀之鉛黃未可紀其名實固不可畢陳於法服也雲者
龍之氣也茹者藻之自生也又不假別爲章目也此蓋不
經之甚也又鸞冕八章三公服之者鸞者太平之瑞也非
三公之德也鷹鷂者鷙鳥也適可以辨祥刑之職也熊者
猛獸也適可以旌武臣之力也又稱藻爲水草無所法象

引張衡賦蒂倒茄於藻井披紅葩之狎獵請爲蓮花取其
文彩者夫茄者蓮也若以蓮代藻變古從今旣不知草木
之名又未達文章之意此又不經之甚也又毳冕六章三
品服之者按此王者祀四望服之名也今三品乃得同王
之毳冕而三公不得同王之衮名豈惟顛倒衣裳抑以自
相矛盾此又不經之甚也又黻冕四章五品服之考之於
古則無其名驗之於今則非章首此又不經之甚也若夫
禮唯從俗則命爲制令爲詔乃秦皇之故事猶可以適於
今矣若夫義取隨時則出稱警入稱蹕乃漢國之舊儀猶

可以行於代矣亦何取於變周公之軌物改宜尼之法度
者哉由是竟寢知幾所請炯俄遷詹事司直則天初坐從
祖弟神讓犯逆左轉梓州司法參軍秩滿選授盈川令如
意元年七月望日宮中出孟蘭盆分送佛寺則天御洛南
門與百僚觀之炯獻孟蘭盆賦詞甚雅麗炯至官爲政殘
酷人吏動不如意輒榜撻之又所居府舍多進士亭臺皆
書榜額爲之美名大爲遠近所笑無何卒官中宗卽位以
舊寮追贈著作郎文集三十卷炯與王勃盧照鄰駱賓王
以文詞齊名海內稱爲王楊盧駱亦號爲四傑炯聞之謂

人曰吾愧在盧前恥居王後當時議者亦以爲然其後崔融李嶠張說俱重四傑之文崔融曰王勃文章宏逸有絕塵之迹固非常流所及炯與照鄰可以企及盈川之言信矣說曰楊盈川文文思如懸河注水酌之不竭卽優於盧亦不減王恥居王後信然愧在盧前謙也

華陰志

嚴挺之名峻以字行華州華陰人少好學姿質軒秀舉進士并擢制科調義興尉號材吏姚崇爲州刺史異之崇執政引爲右拾遺睿宗好音律每聽忘劬先天二年正月望夜胡人婆陁請然百千燈因弛門禁又追賜元年酺帝御

延喜安福門縱觀晝夜不息閱月未止挺之上疏諫以爲
酺者因人所利合釀爲歡也不使靡敝今暴衣冠羅伎樂
雜鄭衛之音縱倡優之玩不深戒慎使有司跛倚下人罷
劇府縣里閭課賦奇嚴呼嗟道路買壞家產營百戲擾方
春之業欲同其樂而反遺之患乃陳五不可誠意忠到帝
納焉侍御史任正名恃風憲至廷中責詈衣冠挺之讓其
不敬反爲所劾貶萬州員外參軍事開元中爲考功員外
郎累進給事中典貢舉時號平允會杜暹李元紘爲相不
相中暹善挺之而元紘善宋遙用爲中書舍人遙校吏部

判取捨與挺之異言於元紘元紘屢詰譙挺之厲言曰公
位相國而愛憎反任小人乎元紘曰小人爲誰曰宋遙也
繇是出爲登州刺史改太原少尹初殿中監王毛仲持節
抵太原朔方籍兵馬後累年仍移太原取兵杖挺之不肯
應且以毛仲寵幸久恐有變密啓於帝俄改濮汴二州刺
史所治皆嚴威吏至重足脅息會毛仲敗死帝以挺之言
忠召爲刑部侍郎遷太府卿宰相張九齡雅知之用爲尙
書左丞知吏部選李林甫與九齡同輔政以九齡方得君
諂事之內實不善也戶部侍郎蕭炅林甫所引不知書嘗